

太平經卷之五十三

分別四治法第七十九

真人純稽首戰慄吾今欲有所復問非道事也見明師言事無不解諫者故乃敢冒慙復前有可問疑一事何等平行吾即為子說矣

夫帝王之仕大臣皆當老少子本非治世人也何為問此哉吾見天氣間者比連不調或過在仕臣失實令使時氣不調人君不明灾害並行道入亦傷令天地三光尚為其病故無正明道士於何自逃獨得不傷故吾雖得獨蒙天私久存常不敢自保初少以來事師問事無能悉解之者今不冒慙重問於天師解諫其要意恐遂無復以得知之也恩唯明師既加不得已為弟子說其所不及善哉子之言也今且見子之言吾知太平之治已到矣然吾且悉言之子隨而詳記之夫治者有四法有天治有地治有人治三氣極然後踐行萬物治也願聞其意天治者其臣老君乃父事其臣師事其臣也夫臣廼卑何故師父事之手哉但其位者卑下道德者尊重師父

事之者乃事其道德當與其合策而平天下也地治者友事其臣若與其同志同心也地者陰順母子同列同苞同憂臣雖位卑其德而和平其君之治人治者卑其用臣少小象父生其子子少未能為父作策也故其治小亂矣踐行萬物並治者視其臣子若狗若草木不知復詳擇臣而仕之但遇官壹仕名為象人無知也何故乎哉象人者財象人形苟中而已不為君計也故善爭之也象天治者天下之臣盡國君之師父也故父事之人愛其子何有危時夫師父皆能為其子解八方之患難何有失時也象地治者天下之臣皆國君之友也夫同志合策為交同憂患欲共安其位地者順而承上悉承天志意皆得天心何有不安時乎象人治者得中和之氣和者可進可退難知象子少未能為父計也欺其父也臣少未能為君深計故欺其君也少者生用日月少人學又淺未有可畏故欺也故其治小亂矣象踐行萬物治者踐行者無禮義萬物者少知無有道德夫踐行萬

物之性無有上下取勝而已故使亂敗矣象天治者仁好生不傷象地治者順善而成小傷象人治者相利多欲數相賊傷相欺息象踐行萬物而治者終無成功無有大小取勝而已觀此之治足以知天氣上下中極未失

治欲樂第一者宜象天欲樂第二者宜象地欲樂第三者宜象人欲樂第四者宜象萬物象天者獨老壽得天心象地者小不壽得地意象人者壽減少象萬物者死無時無數也象天者三通通天文有三文明為三明明謂日月列星也日以察陽月以察陰星以察中央故當三道行書而務取其聰明書到為往者有主名而已勿問通者為誰象地者二道行書象人者一道行書尚見苟留象踐行萬物者纔設言復無文書也今是者天使如是邪人自為之邪時運也雖然帝王治將太平且與天使其好善而樂象天治將中平者象地治將小亂者法人治將大亂而不理者法踐行萬物治此何故乎哉今當以何救之然天將興之瑞應文琦書出付與之令使其大覺

悟而授之將衰者天匿其文不見又使其不好求之賢臣者但得老而已邪不也老者乃謂者舊老於道德也象天獨常守道而行不失銖分也故能安其帝王老而無一知亦不可任也其師父事之云何友之云何子之云何其萬物之云何哉父事之者乃若子取教於嚴父也乃若弟子受教於明師也當得其心中密策祕言聖文以平天下以謝先祖宗廟以享食之其德以報天重功故能得天下之心陰陽調和災害斷絕也其友事者以忠信相與合策深計善惡難易其子事者必若父有伏匿之事不敢以報其子子有匿過不敢以報其父母皆應相欺以此為階也其萬物者大亂無數夫物者春夏則爭生秋冬則爭死不復相假須臾也純拜所問多過誠重甚不宜誠有過於師吾又且不敢匿此文也見而不行之恐得過於皇天吾今當於何置此書哉子既問之子為力特行逢能道者與之使其往付歸有德之君帝王象之以是為治法必且如神矣得而不能深思用之天

亦不復過子也唯唯不敢逆師言然吾言亦不可大逆也此乃天地欲平而出至道使子遠來具問此法天使吾談傳辭於子吾亦不空言也天不欲言而吾言無故泄天之要道吾當坐之子得吾言而往付歸亦無傷無疑吾告子至誠天乃更與帝王厚重故戒之也天之運也吉凶自有時得而行之者吉不疑也謹問行者人姓字為何誰手然天之授萬物無有可私也問而先好行之者即其人也大道至重不可以私任行之者吉不行者疑矣謹更問天地何觀何見時者欲一語言哉實有可觀見不空言也天以安平為懼無疾病以上平為喜故使人民皆靜而無惡聲不戰鬪也各居其所則無病而說喜則天言而不妄語也若令使陰陽違闕錯亂相干更相賊傷萬物不得處其所日月無善明列星亂行則天有疾病悒悒不解不傳其言則病不愈故亂則談小亂小談大亂大談是故古今神真聖人為天使受天心主當為天地談語天地立事以來前後以是為常法故聖人文

前後為天談語為天言事也言談皆何等事也在其所疾苦文失之者為道質若質而不通達者為道文疾其邪惡者為道正善也使其覺悟今天地至尊自神神明位無上何故不自除疾病反傳言於人乎天地者為萬物父母父母雖為善其子作邪居其中中央主為其惡逆其政治上下逆之亂之父母雖善猶為惡家也比若子惡亂其父臣惡亂其君弟子惡亂其師妻惡亂其夫如此則更相賊傷大亂無以見其善也天地人民萬物本共治一事善則俱樂凶則俱苦故同慶也嚮使不共事不肯更迭相憂也是故天地欲善而平者必使神真聖人為其傳言出其神文以相告語比若帝王治欲樂善則有善教今此之謂也子欲樂知天心以報天功以救災氣吾書即是也得之善思念之夫天心可知矣唯唯不敢忽願師復重教一兩言然夫善惡各為其身善者自利其身惡者自害其軀子既有暢善意乃憂天地疾病王者不安其功極已大矣但詳思之子行善極無雙勿復止

傷之也使念善順常若此唯唯不敢懈怠也
不敢懈怠

右念別治所象安危法

太平經卷之五十三

太平經卷之五十四五十五

使能無爭訟法第八十一

傳二

吾所問積多見天師言事快而無已其問無足時復謹乞一兩言平行今吾願欲得天地陰陽人民踐行萬物凡事之心意常使其喜善無已日遊而無職無事其身各自正不復轉相愁苦更相適責豈可得聞乎哉子今且言何一絕快殊異可問者何一好善無雙也然若子所問猶當順事各得其心而因其材能所及無敢反強其所不能為也如是即各得其所欲各得其欲則無有相愁苦者也即各得其心意矣可謂遊而無職事矣天地之間常悉使非其能強作其所不及而難其所不能時觀於其不能為不能言不憐而教之反就責之使其竟結多忿爭訟民愁苦困窮即仰而呼皇天誠冤誠冤氣感動六方故致災變紛紛畜積非一不可卒除為害甚甚是即失天下之人心意矣終及無成功變怪不絕太平之氣何從得來哉故不能致太平也各正在此雖欲名之為常平而內亂何從而

得清其治哉子今問之欲深知其審乎天地之性萬物各自有宜當任其所長所能為所不能為者而不可強也萬物雖俱受陰陽之氣比若魚不能無水游於高山之上及其有水無有高低皆能游往大木不能無土生於江海之中是以古者聖人明王之授事也五土各取其所宜趣其物得好且善而各暢茂國家為其得富令宗廟重味而食天下安平無所疾苦惡氣休止不行為害如人不卜相其土地而種之則萬物不得成竟其天年皆懷冤結不解因而天終獨上感動皇天萬物無可收得則國家為其貧極食不重味宗廟飢渴得天下愁苦人民更相殘賊君臣更相欺詒外內殊辭各正始起於此是者尚但萬物不得其所何況人哉天下不能相治正由此也此者大害之根而危亡之路也可不慎哉可不深思慮之習心乎故古者大聖大賢將任人必先試其所長何所短而後置其職事因而任之其人有過因而責之責問其所長不過所短是者不感天也及為習進此